


土岐文庫
文庫17
W 82
10




文庫 17
W82
10

後山詩鈔

二十

陳師道字履常一字無已號後山彭城人年十六謁曾南豐大器之遂受業焉元豐初曾典史事以白衣薦為屬尋以憂去不果章惇莫其來見將特薦之卒不一往蘇東坡與侍從列薦為教授未幾除大學博士後以蘇氏私黨罷移潁州又換彭澤以母憂不仕者四年元符間除秘書省正字 郊寒甚其妻于僚壻借副裘蓋熙豐黨也竟不衣 卒初學于曾後見黃魯直詩格律一變魯直謂其讀書如禹之治水知天下之脈絡有開有塞至于九川滌源四海會同者作文知古人關鍵其詩深得老杜之法今之詩人不能當也任淵謂讀後山詩似參曹洞禪不犯王位切忌死語非冥搜旁引莫



昭和六十年二月一日
王岐善唐氏寄贈

010185188367

窺其用意處因爲作註蓋法嚴而力勁學瞻而用變
涪翁以後殆難與敵也

妾薄命二首

自注曰爲曹南豐作

主家十二樓一身當三千古來妾薄命事主不盡年起舞
爲主壽相送南陽阡忍着主衣裳爲人作春妍有聲當徹
天有淚當徹泉死者恐無知妾身長自憐

葉落風不起山空花自紅捐世不待老惠妾無其終一死
尚可忍百歲何當窮天地豈不寬妾身自不容死者如有
知殺身以相從向來歌舞地夜雨鳴寒葦

送外舅郭大夫槩西川提刑

丈人東南來復作西南去連年萬里別更覺貧賤苦王事
有期程親年當喜懼畏與妻子別已復迫曛暮何者最可

憐兒生未知父盜賊非人情蠻夷正狼顧功名何用多莫
作分外慮萬里早歸來九折慎馳騫嫁女不離家生男已
當古曲逆老不侯知人公豈誤

送內

鹿麕顧其子燕雀各自隨與子爲夫婦五年三別離兒女
豈不懷母老妹已笄父子各從母可喜亦可悲關河萬里
道子去何當歸三歲不可道曰首以爲期百畝未爲多數
口可無饑吞聲不敢盡欲怨當誰歸

別三子

夫婦死同穴父子貧賤離天下寧有此昔聞今見之母前
三子後視不得追嗟乎胡不仁使我至於斯有女初束
髮已知生離悲枕我不宜起長我從此辭大兒學語言拜



陳後山詩集
必于郭大夫



後山詩集
揖未勝衣喚爺我欲去此語那可思小兒襁褓間抱負有
母慈汝哭猶在耳我懷人得知

寄外舅郭大夫

巴蜀通歸使妻孥且舊居
淡知報消息不忍問何如身健
何妨遠情親未肯疎功名欺
老病疾盡數行書

憶少子

端也早豐下歲晚未可量
我老不自食安得如我長呱呱
棄不予退省未始忘吾母亦
念我與爾寧相望

贈二蘇公

岷峨之山中巴江桂椒桺
檣楓柞樟青金黃玉玕砂良獸
皮鳥羽不足當異人間出駭
四方嚴王陳李司馬楊一翁
二季對相望奇寶橫道驥服
箱誰其識者有歐陽大科異

等固其常小却盛之白玉堂
典謨雅頌用所長度越周漢
登虞唐千載之下有素王平
陳鄭毛視荒荒後生不作諸
老亡文體變化未可量萬口
一律如吃羗妖狐幻人大陸
梁虎豹却走逢牛羊上帝惠
顧祓不祥天門夜下龍虎章
前驅吳回後炎皇絳旂丹轂
朱冠裳從以甲冑萬鬼行乘
風縱燎無留藏天高地下日
月光授公以柄扶病傷士如
稻苗待公秧臨流不度公為
航如大醫王治膏肓外證已
解中尚強探囊一試黃昏湯
一洗十年新學腸老生塞口
不敢嘗向來狂殺今尚狂請
公別試囊中方

送江端禮

正學元非世能詩新有聲
諸公交鄭泰多士閉何生
泥愛經過數移書底裏傾
又為淮海別病眼向誰明

九日寄秦觀

疾風回雨水明霞沙步叢祠欲莫鴉九日清樽欺白髮十年爲客負黃花登高懷遠心如在向老逢辰意有加淮海少年天下士可能無地落烏紗

示三子

去遠卽相忘歸近不可忍兒女已在眼眉目略不省極喜不得語淚盡方一哂了知不是夢忽忽心未穩

烏呼行

去年米賤家賜粟百萬官倉不餘掬青錢隨賜費追呼昔日剝瘡今補肉今年夏旱秋水生江淮轉粟千里行不應遠水救近渴空倉四壁雀不鳴聞爲政不爲費兩不相傷兩相濟十年斂積用一朝驚濤破山風動地

送張支使

曠度逢知晚高才處下難清秋一鶚上拭目萬人看白酒初同醉黃花已戒寒憑將衰老事一一報長安

從蘇公登後樓

倏作三年別才堪一解顏樓孤帶清洛林缺見巴山五月池無水千年鶴自還白鷗沒浩蕩愛惜髣毛斑

次韻李節推九日登南山

平林廣野騎臺荒山寺鳴鐘報夕陽人事自生今日意寒花只作去年香巾歆更覺霜侵髣語妙何妨石作腸落木無邊江不盡此身此日更須忙

田家

鷄鳴人當行犬鳴人當歸秋來公事急出處不待時昨夜

三尺雨竈下已生泥人言田家樂爾苦人得知

出清口

家世山東飽耕稼晚託一舟順流下漁溝寒餅不下筋推
梳轉頭夏五夜平明放溜出清口霜落潮回霧連野平淮
一夢三十壘有日無風神所借似憐憂患滿人間百孔千
瘡容一罅文章未技將自効語不驚人神可嚇子女玉帛
君所餘寄聲白鳥煩多謝

贈歐陽叔弼

早知汝穎多能事晚以詩書託下僚大府禮容寬懶慢故
家文物尚嫖姚只將憂患供談笑敢望功言答聖朝歲歷
四三仍此地家餘五一見今朝

觀文忠公家六一堂圖書

生世何用早我已後此翁頗識門下士略已聞其風中年
見二子已復歲一終呼我過其廬所得非所蒙先朝羣玉
殿冠佩環羣公神文煥王度喜色見天容御榻誰復登帝
書元自工黃絹兩大字一覽涕無從似欲託其子天意人
與同歷數况有歸政有貪天功集古一千卷明明並羣雄
誰爲第一手未有百世公廟器刻科斗寶樽蟠華蟲繡懷
弁服士酬獻鳴琤琮插架一萬軸遺子以固窮素琴久絕
弦棊酒頗闕供向來一瓣香敬爲曾南豐世雖嫡孫行名
在亞子中斯人日已遠千歲幸一逢吾老不可待露草濕
寒葢

送蘇迨

曾中歷歷着千年筆下源源赴百川真字飄揚今有種清

談絕倒古無傳出塵解悟多爲路隨世功名小着鞭白首
相逢恐無日幾時書札到林泉

送黃生兼寄二謝

城西兩謝俱能文穰丞精悍吾所聞每讀吾詩得人意使
不能文已可人我昔謝公門下士早年妄作功名意如今
老寄穎河東九泉雖深愧此公

次韻蘇公西湖徙魚三首

窮秋積雨不破塊霜落西湖露沙背大魚泥蟠小魚樂高
丘覆杯水如帶魚窮不作搖尾憐公寧忍口不忍鱸脩鱗
失水玉參差晚日搖光金破碎咫尺波濤有生死安知平
陸無灘瀨此身寧供刀几用着意更須風雨外是間相忘
不爲小濠上之意誰得會枯魚雖泣悔可及莫待西江與

東海

赤手取魚如拾塊布網鳴舷攻腹背豈知激濁與清流恐
懼駢頭牽翠帶居士仁心到魚鳥曾有微生化餘鱸寧容
網目漏吞舟誰能烹鮮作苛碎我亦江湖釣竿手悞逐輕
車從下瀨生當得意落鷗邊何用封侯墮鳶外不如此魚
今得所置身暗與神明會徑須作記戒鯨鯢防有任公釣

東海

詩成落筆驥歷塊不用安西題紙背小家厚劔四壁立拆
東補西裳作帶堂下殼鯨牛何罪太山之陽人作鱸同生
異趣有如此鉗懸甕間終一碎流水長者今公是雨花散
亂投金瀨人言充庖須此輩慈觀更須容度外賜墻及肩
人得視公才槃槃一都會有憐其窮與不朽我亦牽聯書

玉海

八月十日二首

一夢人間四十年只應炊竈固依然兩官不辦一丘費五
字虛隨萬里船

人生七十今強半老去光陰已後身更欲置身須世外世
間元自不關人

迎新將至漕城

早投林野違風雨晚傷塵沙飽送迎却愧兩街屠販子卧
聽車馬過橋聲

卽事

老覺山林可避人正須麋鹿與同羣却嫌鳥語猶多事強
管陰晴報客聞

齋居

青奴白牯靜相宜老罷形骸不自持一枕西窗淡閉閣卧
聽叢竹雨來時

寄亳州林侍制

湖海相望闕寄聲雲林過雨未全晴青衫作吏非前日白
首論文笑後生似聽兒童迎五馬稍修書札問專城一聞
苦李蒙莊句不復人間世後名

次韻回山人

一杯領意不須沽六字持身已有餘痴子未知天上樂先
生今解世間書

又次屬沈東老

隨世功名非所望稱家豐儉不求餘青衫出指論奇字白

髮挑燈寫細書

送孝忠二首

老眼元多淚春風見此行又爲貧賤別更覺急難情斗食
吾堪老詞場爾向榮未須憐野鴛家法付宣城
經史三年學聰明一旦開把文甘潦倒數日待歸來士患
聲名早官今歲月催有親須薄祿臨路尚徘徊

以桂桂一作杜杖供仁山主

洗足投筇只坐禪厭尋岐路費行纏老來不復人間事不
用山公更削圓

西湖

小徑才容足寒花只自香官池下鳧鴈荒塚上牛羊有子
吾甘老無家去未量三年哦五字草木借輝光

送吳先生謁惠州蘇副使

聞名欣識面異好有同功我亦慚吾子人誰恕此公百年
雙白鬢萬里一秋風爲說任安在依然一秃翁

別觀音山主

離合應生理過逢豈近緣情親見今日語妙記當年閉戶
安禪主衝風逆水船不應清夜月故作別時圓

離頌

河市千人聚寒江百尺牽吾生能幾日此地費三年叢竹
防供爨池魚已割鮮拙勤終不補他日愧無傳

答晁以道

轉走東南復帝城故人相見眼偏明十年作吏仍餬口兩
地爲鄰闕寄聲冷眼尚堪看細字白頭寧復要時名孰知

范叔寒如此未覺嚴公有故情

別黃徐州

姓名曾落薦書中刻畫無鹽自不工一日虛聲滿天下十年從事得途窮白頭未覺功名晚青眼常蒙今昔同衰疾又為今日別數行老淚灑西風

古墨行 并序

晁無斃有李墨半丸云裕陵故物也往於秦少游家見李墨不為文理質如金石亦裕陵所賜王平甫所藏者潘谷見之再拜云真廷珪所作也世惟王西學士有之與此為二矣嗟乎世不乏奇乏識者耳敬為長句率無斃同作

秦郎百好俱第一烏鳥一丸如漆姿如石巧作松身與鏡

面借美於外非良質潘翁拜跪摩老眼一生再見三歎息了知至鑿無道形王家舊物秦家得君今所有亦其亞伯仲小低猶子姪黃金白壁孰不有古錦句囊聊可敵睿思殿裏春夜半燈火闌殘歌舞散自書細字答邊臣萬里風塵入長算初聞橋山送弓劍寧知玉盃人間見夜光炎炎衝斗牛會有太史占星變人生尤物不必有時一過目驚老醜念子何忍遽磨研少待須臾圖不朽魏衍注曰少游此詩時少游尚無恙然終先逝去明窗淨几風日暖有愁萬斛才八斗徑須脫帽管城公小試玉堂揮翰手

次韻春懷

老形已具臂膝痛春事無多櫻笋來敗絮不溫生蟻蝨大杯覆酒着塵埃衰年此日常為客舊國當時只廢臺河嶺

尚堪供極目少年爲句未須哀

河上

背水連漁屋橫河架石梁窺巢鳥鵲競過雨艾蒿光鳥語
催春事窗明報夕陽還家慰兒女歸路不應長

題柱

并序

永安驛廊東柱有女子題五字云無人解妾心日夜長
如醉妾不是瓊奴意與瓊奴類讀而哀之作二絕句
桃李催殘風雨春天孫河鼓隔天津主恩不與妍華盡何
限人間失意人

從昔嬋娟多命薄如今歌舞更能詩孰如如一文雅河陽
令不削瓊奴柱下題

蠅虎

物微趣下世不數隨力捕生得稱虎匿形注目搖兩股卒
然一擊勢莫禦十中失一八九取吻間流血腹如鼓却行
奮臂吾甚武明日淮南作端午

宿溪明閣

窈窕溪明閣晴寒是去年老將災疾至人與歲時遷默坐
元如在孤燈共不眠莫年身萬里賴有故人憐
縹緲金華伯人間第一人劇談連晝夜應俗費精神時要
平安報反愁消息真墻根霜下草又作一番新

東山謁外大父墓

土山宛轉屈蒼龍下有槃槃蓋世翁萬木刺天元自直叢
篁侵道更須東百年富貴今誰見一代功名託至公少日
拊頭期類我莫年垂淚向西風

次韻晁無斁冬夜見寄

寒窗冷硯欲生塵短枕長衾却自親老子形骸從薄暮先
生意氣尚青春覆杯不待回丹頰危坐猶能作直身城郭
山林兩無得莫年當復幾霑巾

寒夜有懷晁無斁

同好共城郭十日不一顧人事雖好垂吾生亦多忤闔門
對妻子歲月不可度閉目寧用遮停杯仍下筯獨無區中
緣永懷岩下趣平生三徑資安得一朝具萬里初歷塊前
驅告曛暮歸懷屬有思棄世不待怒老境厭遶遲人情費
將護向來張長公吾亦從茲去燈花頻作喜月色正可步
預恐何水曹明朝有新句

寄提刑李學士

石渠金馬青雲上東里西門濟水邊上冢過家真樂事平
時持節貴當年成家舊學諸儒問脫手新詩萬口傳范叔
一寒今若此相逢猶得故人憐

寄杜擇之

杜寄惠近詩

詩家兩杜昔無隣文采風流

一作傳家

世有人疾置送詩驚老

醜坐曹得句自清新興來不假江山助目過渾如草木春
農馬智專吾不讓衡陽紙貴子能頻

寄晁無斁

稍聽春鳥語丁寧又見官池出斷冰雪後踏青誰與共花
間着語老猶能笑談莫倦尋常聽山院終同一再登今日
已知他日恨槍榆况得及飛騰

還里

後山詩集
十一
曠士愛吾廬遊子悲故鄉慷慨四方志老衰但悲傷虛名
自成誤失得略相當莫年還家樂未覺道路長間里喜我
來車馬塞康莊爭前借言色草木亦晶光向來千人聚一
老獨徜徉手開南陽阡松柏鬱蒼蒼永願守一丘脫身萬
里航平生功名念倒海荒我腸款段引下澤斷弦更空觴
尚恐北山南有文移路傍

次韻夏日江村

漏屋簷生菌臨江樹作門捲簾通燕子織竹護鷄孫向夕
微一作風涼進相逢故意存一作需衣何當加我歲從子問
乾坤

次韻夏日

江上雙峰一草堂門開心靜自清涼詩書發冢功名薄麩
鹿同羣歲月長句裏江山隨指顧舌端幽眇致張皇莫欺
九尺鬚眉白解醉佳人錦瑟傍

夏夜有懷

卧念張居士逃名老石根學詩端得瘦識字卽空樽鳴笛
夜宜遠燈花曉更繁未須哀老子也復守丘園

和顏生同遊南山

竹杖芒鞋取次行琳琅觸目路人驚當年此日仍爲客病
目今來喜再明筋力尚堪供是事登臨那得總無情已知
名世徒爲爾可復緣渠大瘦生

和魏衍元夜同登黃樓

車馬競清夜人物秀三楚登臨得免俗茲樓豈時睹同來
兩稚子冠者亦四五落落俱可人頗亦厭歌鼓山月出未

後山詩錄 十一
高潛鱗動寒渚檣燈接稀星奪目粲不數魏侯轉物手百
好趨就叙得句未官吐秀氣出眉宇水淨納行影山空答
脩語夜氣稍侵肌鳥駭去其侶清游豈有極喜事戒多取
投靜未免喧于今豈非古永懷寂寞人南北忘在所橫嶺
限魚鳥作書欲誰與情生文自哀意動足復佇憑楹一作
其一默望舒已侵午

和魏衍同登快哉亭

經時不出此同臨小徑新摧草舊侵欲徬江山看日落不
堪花鳥已春深來牛去馬中年眼朗月清風萬里心故着
連峰當極目回看幽徑遶雙林

和三日

苦遭年少強追陪病眼看花更覆杯夾岸萬人傾國出清

江一注兩山開遊人欲盡驚鷗下晚日猶須惡雨催更恐
明年有離別折花臨水共徘徊

登燕子樓

綠暗連村柳紅明委地花畫梁初着燕廢沼已鳴蛙鷗沒
輕春水舟橫着淺沙相逢千歲語猶說一枝花

和黃充實春盡遊南山

逐勝缺勇功餞春無少色出門欲何向坂九隨所擊百年
餘幾何十步復一息同來二三子楚楚頗修飭行前強老
夫徑捷疲峻陟山門開煙霏禪房閉岑寂口燥沾茗椀久
厄此爲德逐日下西山草路荒不識回溪轉鈎曲門徑入
繩直故人喜領客內愧積腸臆所來爲親舊掃除稱寥閭
疾風無末勢過雨有餘瀝高花初欲然平荷已如拭因君

感衰盛醜好移頃刻交新厭區區話舊聽歷歷談間十一
二四座已傾側茅屋漏一作濕風霜山田帶沙礫尚能哀此
老舉手觸四塞君如澗底松超拔出天壁學詩有新功黃
魏共推激生與魏衍黃預游

何郎中出示黃公草書

龍蛇起伏筆無前江漢淵回語更妍好事元須一賞足藏
家不必萬人傳

當年關里與論詩晚歲江山斷夢思妙手不為平世用高
懷猶有故人知

送河間呂令子固甥

今日中牟令當年太守孫獨能憐此老官避席為門寒日
風濤壯邊城簿領繁平生子曾子白首得重論

寄潭州張芸叟

湖嶺一都會西南更上游秋盤堆鴨脚春味薦猫頭宜室
來何暮蒸池得借借一作留孰知為郡樂莫作越鄉憂

去國如前日為邦得舊游霜柑先落手春鴈幾回頭只道
風沙惡寧知賈宋留賦詩真有助弔古不同憂

雪後

送往開新雪又晴故留臘白待春青稍見松色伸梅怨併
得朝看與夜聽已覺庭泥生馬一作身迹遽修田事帶朝星
莫年功力歸持律不是騷人故獨醒

送提刑李學士移使東路

襟抱從前相向開倡酬于此未多陪身更寵辱談彌勝路
別東西意自哀隱几忘言終不近白頭青簡兩相催孰知

後山詩集 十四
衰老難為別聲問應須續續來

隱者郊居

高齋繚繞度雙溝老氣軒昂蓋九州不為江山開悒快正
緣風味得淹留招攜好客共談笑拆補新詩擬獻酬小摘
自鋤稀菜甲旁觀虛作不堪憂

送檢法趙奉議

三歲公門不屢過作牋時得問如何及茲去去翻為恨向
使常常官謂多勇銳閉房猶着酒切深疾惡反傷和贈言
竊取仁人號善聽君居長者科

寄曹州晁大夫

東方千騎貴當年白髮居頭也自賢官費精神修客主稍
回功譽入章篇虛名不救一作空腸厄晚歲仍遭末疾纏

死去不為天下惜鏡中當有故人憐

送馮翊朱令

三楚風流信有人先聲今已徹咸秦寧為鷄口官無小欲
試牛刀久要新細肋卧沙勤下筋長芒刺眼莫霑脣山西
一作豪傑知吾老為說猶堪舉萬鈞

酬智叔見贈

老去斯文不更論却因夫子話師門清談不待傾三語勝
日何知共一樽逐北我方填坎井圖南誰得料鵬鯤過逢
為說侯芭在卧楫生衣犢有孫

敬酬智叔三賜之辱兼戲楊理曹二首

龍爭虎據竟成塵只有青樓與白門青樓謂燕令宰才高
先得句使君情重數開樽江山故國難留鶴科斗荒池可

可着鯤直使領鬚渾作白未應投鐏愧諸孫智叔有嘆白髮詩
險韻屢詞費討論真持布鼓過雷門更看九日臺頭句未
用三人月下樽鏡裏黃花明白髮海邊赤脚踏長鯤從來
相戒莫打鴨可打鴛鴦最後孫

酬智叔見戲

百念皆空習尚存稍修香火踏空門槌腰摩腹非春事割
愛投閑覆上樽白髮情多猶可染來詩有白髮之嘆驂鸞典盡却
乘鯤上界紛紛足官府也容河鼓過天孫
雨花風葉未宜春私柳官渠白下門每度清溪嘲短髮時
容使席近芳樽雄蜂雌蝶元非偶野馬遊塵不佐鯤若許
成功當封賞事只李待制席上篇請看子子與孫孫
九月九日與智叔鵬堂宴集夜歸

鵬堂從昔有惡客酒盡不去仍復索欲留歌舞盡客意風
雨和更作三厄佳辰難得客更難我窮無酒為君歡只欲
泥行過白下萬一簾疎見一斑

絕句四首

秋牀歸卧不緣愁病與衰謀作老仇數樹直青能爾瘦一
軒殘照為誰留
芒鞋竹杖最關身散髮披衣不待人三兩作鄰堪共話五
千插架未為貧
昏昏嗜睡元非病續續題詩不耐閑作意買山還得笑多
方拔白却成斑
書當快意讀易盡客有可人期不來世事相違每如此好
懷百歲幾回開

懷遠

任淵注云此詩屬東坡

海外三年謫天南萬里行生前只爲累身後更須名未有
平安報空懷故舊情斯人有如此無復涕縱橫

· 答田生

酒亦有何好人今未肯忘苟無愁可解何必醉爲鄉賸欲
論奇字終能諱秘方直饒肌骨秀正要畫眉長

早起

鄰鷄接響作三鳴殘點連聲殺五更寒氣挾霜侵敗絮賓
鳩將子度微明有家無舍惟一作高枕百巧千窮只短檠
翰墨日疎身日遠世間安得尚虛名

和黃充小雪

度臘侵春亦未遲紛紛款款意猶微露衣帶潤元無見着
物還消不待晞賸欲打聽連夜聽未須迷鴈斷行飛老來
才盡無新語只欲煩君急手揮帶潤一作自濕

謝趙使君送烏薪

欲落未落雪近人將盡不盡冬壓春風枝冰瓦有去鳥遠
坊窮巷無來人忽聞叩門聲遽速驚鷄透籬犬升屋使君
傳教賜薪炭妓圍那解思寒谷老身曲直不足云冷窓凍
壁作春溫定知和氣家家到不獨先生雪塞門一作席作

和范教授同遊桓山

送客尋山已自仙行談坐笑復忘年平郊走馬斜陽裏破
屋傳杯積水邊洗壁留名題歲月一作題名登高着句記
山川風流幕下諸公子縮手吟邊更覺賢

早春

度臘不成雪迎年遽得春水開還舊綠魚喜躍脩鱗柳及
年年發愁隨日日新老懷吾自異不是故違人

徐僊書

徐清字靜之蓬萊女官也下西里王氏詩作謝體書效
黃魯直妍妙可喜敬作三絕句

蓬壺仙子補天手筆妙詩清萬世功官學黃家元祐脚信
知人厄匪天窮

詩成已作客兒語筆下還爲魯直書豈是神仙未賢聖不
隨時事向人疎

金華牧羊小家子西真攘桃何代兒詩着海山書落爪向
來何一作那免世人疑

咸平讀書堂

昔人三百篇善世已有餘後生守章句不足供囁嚅一登
吏部選筆硯隨掃除閉閣畫眉嫵隔屋聞歌呼奉公用漢
律寧復要詩書俛首出跨下枉此七尺軀今代陶朱公不
作大梁屠計然特未用意得輕全吳爲邦得畿縣政密自
計疎寧書下下考不奉急急符用意簿領外築室課典謨
平生五千卷還舍不問塗近事更漢唐稍以詩自娛復作
無事飲醉卧擁青奴桃李春事繁軒窓晝景舒鳴屋鳩渴
雨窺簾燕哺雛休吏散篇帙風篁獻笙竽听然一啓齒斯
民免爲魚

絕句二首

里中飽杏得嘗新馬上逢花始見春勤苦著書如此吏世
間枉是最閑人

密密丹房疊疊花一枝臨路爲人斜
丁寧語鳥傳春意白
下門東第幾家

春懷示鄰里

斷牆着雨蝸成字老屋無僧燕作家
剩欲出門追語笑却嫌歸鬢着塵沙
風翻蛛網開三面雷動蜂窠趁兩衙
屢失南鄰春事約只今容有未開花

和寇十一晚登白門

重門傑觀屹相望表裏山河自一方
小市張燈歸意動輕衫當戶晚風長
孤臣白首逢新政遊子青春見故鄉
富貴本非吾輩事江湖安得更相忘

謝寇十一惠端硯

百工營才先利器市道居貨如作贅
書生活計亦酸寒斷

塙半瓦寧求備端溪四山下龍淵鬱積中
州清淑氣金聲玉骨石爲容
河江屈流雲作使滑如女膚色馬肝
夜半神光際天地諸天散花百神喜
知有聖人當出世沒人投溪索千丈探
領適遭龍伯睡轆轤挽出萬人負千歲
之藏一朝致琢爲時樣供翰墨十襲包
藏百金貴北行萬里更衆目寇卿好事
不計費南鄰居士卿之孫豐悴相從不
爲異似憐陶瓦磨竈煤輟誦不減前人
志人言寒士莫作事鬼奪客偷天破碎
龜玉輻匱與無同錦衾還客棄佳惠衆
所欲得當有緣天獨於余可無意
敢書細字注魚蟲要傳華嚴八千偈

再和寇十一

與世相違孰自量資身無策謾多方
逢場作戲真呈拙誤

筆成蠅豈所長名字不歸青史筆形容終老白雲鄉何作
可須五斗輕千里賴有斯人未肯忘

謝趙生惠芍藥

從微至老走風塵喜見鄉園第四春獨舞東風醉西子政
緣無語却宜人

九十風光次第分天憐獨得殿殘春一枝賸欲簪雙鬢未
有人間第一人

寄鄰

借子翩翩果下駒春原隨處小踟躕可能多背春風裏卧
把青銅摘領鬚

和寇十一同登寺山

度暑無好懷憑危略幽致衣冠蔚如林從我才一二茲山
昔溪登歲月誰得記尚有名勝流不與金石悴孰知千載
後我與子復至煙昏倏見燈洪發疑無地領略章句手割
據英雄志與壞容一瞬今昔當幾喟圍山缺西北放目不
可制歸懷納濼苑夜榻成良寐零落壁間詩豈特彼所愧
會逢南過適不問西來意

謝孫奉職惠胡德墨

奚李風流盡法傳外諸孫常山陳贍子懷抱自高擗孰云
勝潘翁惟眉山公言四海未盡識一變歸九原胡郎少年
子外家典刑存一點落髭漆重價壓璵璠孫侯磊落人情
義久益惇解囊贈玄圭孰知師白猿我資不解書下筆輒
自愛良寶不受辱隱默面稱寬

拱翠堂

蕭邑富人實敦禮即泉山作此堂規制宏麗
無咎作記

千年茅竹蔽幽奇一日堂成四海知便有文公來作記尚
須我輩與題詩至人但有經行處寶蓋仍存朽老枝能事
向來非促迫經年安得便嫌遲

和李使君九日登戲馬臺

登高能賦屬吾儕不用傳杯擊鉢催九日風光堪落帽中
年懷抱更登臺江山信美因人勝萸菊逢辰滿意開二謝
風流今復見千年留句待公來

與魏衍寇國寶田從先二姪分韻得坐字

將老蒙誤恩受吊不受賀欲起尚遲回積閑習成惰向來
二三子相與守寒餓一日不可無三歲安得過是時秋益
高夜永月初墮漏鼓已再更坐者餘幾箇酒薄多可強談
勝堅莫破簷昏讀字細林缺瞻星大吳吟未至慢楚語不
假些懷遠已屢歎論昔先急睡身世喜相違真成蠟旋磨
平生陳孟公晚歲不驚坐

初破莫破一作莫搥

和笈生出游

賸欲登臨強作歡衣冠未動意先闌從今泉石非吾事只
借君詩細細看

從寇生求茶庫紙

南朝官紙女兒膚玉版雲英比不如乞與此翁元不稱他
年留待大蘇書

酬顏生惠茶庫紙

破卵剝膜肌理滑削玉作版光氣熏老子尚堪哦七字阿
買頗能書八分

黃樓

樓以風流勝情緣貴賤移屏亡老畢篆市發大蘇碑更覺
江山好難忘父老思只應千載後覽古勝當時

答黃生

魏衍注云時初冬尚無冬衣先生以肯子贈之堅不受到家以朱氏所贖二疋寄之因作

詩

我無置錐君立壁春黍作糜甘勝蜜綈袍不受故人意樂
餌有爲兒輩屈割白鷺股何足難食鷓鴣肉未爲失暮年
五斗得千里有愧寒簷背朝日

五子相送至湖陵

中年患別多作別早日諱窮常得窮勿云一水四十里衣
冠塞郭何人同周生子病輟身出劉子遠來今幾日石家
仲叔好少年頗能壓俗從吾律魏君不獨相從早自君之
來吾却掃歲月磨人孰能久反覆看渠難得好湖陵古城

風日寒情義乃知生別難高懷已爲故人盡交道應留後

代看

家山晚立

遠舍苔衣積倚墻梨頰紅地平宜落日野曠自多風禹迹
千年後家山一顧中未休嗤土偶已復逐飄蓬

寒夜

一夜風澎浪中宵月脫雲到窓資少睡遠響倦多聞星火
遠相亂江山氣不分早鷄先得便斷鴈屢鳴羣

山口

重霧真成雨疎簾不隔風青林擁紅樹家鶯雜賓鴻漁屋
渾環水晴湖半落東往來成一老猶在半塗中

宿合清口

後山詩集 二十二
風葉初疑雨晴窓誤作明穿林出去鳥舉棹有來聲溪渚
魚猶得寒沙鴈自驚卧家還就道自計豈蒼生

宿泊口

弱柳經寒色懸流盡夜聲更長疑睡少霜落怯寒生急急
占星度搖搖苦舫傾風濤兼盜賊恩重覺身輕

宿柴城

卧埋塵葉走風煙齒豁頭童不計年起倒不供聊應俗高
低莫可只隨緣通通遠鼓三行夜隱隱平湖四接天枕底
濤波篷上雨故將羈旅一作老到愁邊

晚坐

柳弱留春色梅寒讓雪花溪明數積石月過戀平沙病減
還增藥年侵却累家後歸栖未定不但只昏鴉

寒夜

留滯常思動艱虞却悔來寒燈挑不焰殘火撥成灰凍水
滴還歇風簾掩復開熟知文有忌情至自生哀

晚興

去國猶能別逢人始欲愁不干遮極目自是怯回頭布網
收魚慘連筒下釣鈞誰初教鮮食澤竭未能休

別劉郎

魏衍注云宣義之婿六年之別先生喪母劉
喪父故其詩哀甚

一別已六載相逢有餘哀公私兩多事災病百相催無酒
與君別有懷向誰開淡知百里遠官為老夫來

鷄籠鎮

今隸州界

河市新經集鷄籠舊得名初聞北人語意作故鄉聲客次
艱難極情忘去就輕空虛仍瘖忘何以慰諸生

酬王立之二首

頓有亭前玉色梅，情知不有破寒開。似憐憔悴兩公黃。指蘇

客獨倚東風遣信來。

重梅雙杏巧相將，不為游人只自芳。應怪詩翁非老手，相逢不作舊時香。

和謝公定觀秘閣文與可枯木

斯人不復有累世，或可期每於丹青裏。一見如平時壞障，塵得入慘淡令人悲。墨色落欲盡，巖顏終不移。朽老莫使年石心，烏銅皮念此猶少作。未盡水霞姿，北枝把異鵲。意定了不疑惜哉，不得語曾次幾興衰。一為要貴役，可復愧一作畫師隱奧。雖可惜塗抹，復見遺謝侯名家子。感慨形苦詞，豈惟語畫工。勁特頗似之，何當補諫列。一吐曾中奇。

贈吳氏兄弟

得失媿妍只自知，略容千載有心期。恨君不見金華伯，何處如今更有詩。

上晁主客

時與無咎對酒及門而闕者辭焉

兩疏父子共含香，不獨家榮國有光。賸欲展懷因問疾，孰知相對只銜觴。年侵身要兼人健，節近花須滿意黃。從昔竹林須小阮，只今未可棄山王。

贈石先生

多方作計老如期，百疾交攻遽得衰。晚有勝緣逢異士，生須快意闕前知。迫人鬢領紛紛白，臨事迴迂種種遲。分我刀圭容不死，他年鶴馭得追隨。

送歐陽叔弼知蔡州

後山詩集 二十四
穎陰爲別悔忽忽十載相望信不通晚遇聖朝收放逸旋
遭官禁限西東又爲太守專淮右贍喜郎君類若翁梅柳
作新詩興動可令千里不同風

送晁堯民守徐

中年爲別不堪憂東髮登門到白頭南省望郎仍國士東
方千騎更吾州彭翁老壽終遺骨燕子飛來只故樓知己
難逢身易老煩公置醴我歸休

山口阻風

夕風朝未回來雲去爲雨繫舟直山口天意遽如許濤風
兩方鬪丘原莫當怒兩山爲俯仰一鳥不得度臨深負高
枕偷生寧得所歷歷數過帆當途氣如虎快意亦適然淹
泊豈吾取溯洄更去留未易相爾汝行登東山顛壯觀前
來覩九澤不涓眼五丈方一壑茲山昔誰遊巨野傳自古
菰魚無凶年末利猶不禦荷喫活萬人黎埒視千戶東方
富絲麻小市藏百賈連檣自南北行談雜秦楚向晚風力
微湖清魚可數空倉鳥鳥樂外舍窗扉語身非天下惜家
無十金聚欲留盜賊迫欲去渡濤怒兩者爾何從一死吾
未與

嘲無咎文潛 二首

詩人要瘦君則肥便然偉觀詩不宜詩亦於人不相累黃
金九鑲腰十圍

一饑緣我不緣渠身作賈孟行詩圖窮人乃工君未可早
據要路安肩輿

次韻夜雨

暗雨來何急寒房客自醒驟看燈閃閃擬對竹青青聲到
江干靜風回葉上聽更長那得曉欹側想儀型

和王子安至日

近節翻多事爲家不亦難老成須藥力愁絕向誰寬凍雨
能妨夢朝霜故作寒衰顏心自了不待鏡中看
物理有終極人情從往還陰陽消長際老疾去留間申白
徒懷惠巢由不買山更歌吾和汝風日稍侵顏
晨起公私迫昏歸鳥雀催百年忙裏盡萬事醉間來竹雨
滾宜晚江梅半欲開風燈挑不焰寒火撥成灰

連日大雪以疾作不出聞蘇公與德麟同登女郎臺
掠地衝風敵萬人蔽天密雪幾微塵漫山塞壑疑無地投
隙穿帷巧致身晚積讀書今已老閉門高卧不緣貧遙知

更上湖邊幸一笑潛回萬室春

是日賜紫朱

立春

馬蹄殘雪未成塵梅子梢頭已着春巧勝向人真奈老衰
顏從俗不宜新高門官送青絲菜下里誰思白髮人共學
少年天下士獨能濡濕轍中鱗

次韻敬酬元弼三兄

冥冥雨力及時來冉冉春光作意回白髮尚堪供語笑青
衫不惜着風埃林廬要自家家到尊酒寧辭日日開只恐
未便文字飲人間無夢到陽臺

除夜對酒贈少章

歲晚身何託燈前客未空半生憂患裏一夢有無中髮短
愁催白顏衰酒借紅我歌君起舞潦倒略相同

贈知命

黑頭居士元方弟，不肖作公稱法嗣。外人怪笑那得知，他日靈山親授記。學詩初學杜少陵，學書不學王右軍。黃塵扶杖笑鄰女，白衫騎驢驚市人。靜中作業此何因，醉裏逃禪却甚真。顧我無錢呼畢曜，有人載酒尋子雲。君家魯直不解事，愛作文章可人意。一人可以窮一家，怪君又以才爲累。請將飲酒換吟詩，酒不窮人能引睡。不須無事與多愁，老不欲醒惟欲醉。

謝傅監

好士如好色，昔聞今則無。平生席爲門，未識長者車。曠士慕林谷，羈人辱泥塗。願爲執鞭役，莫順下風趨。去年辱公先，懷刺留寓居。我往拜其門，鸞鷲鳴高梧。論交不計年，取材忘其愚。一寒我如此，百鎰公無餘。今年賀公歸，乃復過我廬。當使有近行，磨門有長須。小家不耐事，鷄飛犬升閭。莫歸自有恨，親顏一何娛。汝家吾無憂，能致賢大夫。吳公漢庭右，賈生世用疎。平分大倉粟，盡讀鄴侯書。士爲知己留，不爲食有魚。三言移曾母，投杼公何如。

次韻答秦少章

學詩如學仙，時至骨自換。縹緲鴻鵠上，衆目焉能玩。子從淮海來，一喙當百難。師儒有韓孟，拭目互驚惋。老生時在傍，縮手愧顏汗。黃公金華伯，莞爾回一眄。彼方試子難，疾前不應懦。要當攻石堅，勿作搏沙散。植壁雖具美，礎錯加璀璨。我老不足畏，後生何可慢。

九月十三日出善利門

十載都城客孤身百艱一饑非死所萬里有生還去國
吾何意歸田病不關共看霜白鬢似得半生閑

湖上晚歸寄詩友

髭髮難藏老湖山穩寄身却尋方外士招作社中人霜葉
淡於染秋花晚自春無人還有礙詩卷莫辭頻
簑笠宜多病衣冠錯致身清愁偏待客白髮解禁人江月
淡留雪山梅借探春興從湖上發詩爲道人頻
功名違壯志戒律負前身劉德長欺客王融却笑人殘年
憎送歲病眼怯逢春杖屨知何向如君未厭頻
紅綠羞明眼欹斜久病身年齡不待命湖海却留人點滴
花間露新鮮柳上春情懷將底用詩外不須頻

寄邢和叔

昔作梁宋遊幽憂廢朝昏閉門無往還不厭兒女喧隔牆
聞剝啄莫夜誰叩門知是邢夫子低回過高軒願爲布衣
交不顧年德尊忽忽立談罷又見東南奔江湖多病後僅
免餉魚鼈久廢數行書因人問寒暄但愛孤山西松筠數
家村便欲築居室插秧仍灌園生前不自愛身後何足論
草玄笑楊雄贊易悲虞翻文章徒自苦紙筆莫更存却尋
南郭老隱几學忘言他日宦遊客誤入桃花源葦間見漁
父誰識王侯孫

十七日觀潮

潮頭初出海門山千里平沙轉面間猶有江神憐北客欲
將奇觀破衰顏

江水悠悠自在流向人無恨一作不應愁相逢不覺渾相

似誰使清波早白頭

宿錢塘尉廨

平湖遶舍山無盜官事長閑俸有金安得終身為禦寇不
辭兒女作吳音

贈關彥長

少年初識字已誦子虛賦嘗疑天上人已離人間去蹉跎
二十年久自歎遲暮倦游梁宋間却踏江湖路此地始逢
君秋陽破朝霧白首鬢毛新青衫顏色故問君胡爲然竟
坐文字誤人事久難知高才常不遇論人較賢智富貴寧
在數不見竹林詩山王俱不與湖塘發高興山林有佳處
迨此閒暇時觀遊莫辭屢功名如附贅得失何用顧但當
勤秉燭長願隨杖屨

贈太素 軻律師

山居不出十四年矣

林間細路暗通門火閣深藏雪裏春自笑世間千計錯羨
他湖上十年人

次韻關子容湖上晚飲

風樹吹花落四鄰暮雲將雨作催人旋傾美酒留連客急
作新詩報答春試傍清湖看鬢髮莫辭行樂費金銀如今
歸去還高卧更問風光有幾旬

夏日書事

花絮隨風盡歡娛過眼空窮多詩有債愁極酒無功家在
斜陽下入歸滿月中肝腸渾欲破魂夢更無窮

石無咎畫苑

卒行無好步事忙不草書能事莫促迫快手多龔疎君看

荷葦櫛葉扇崔家中叔三人俱掃除事物費歲月收完神
氣忘形軀恍然有得奪天巧衰顏生態能相如市師信手
無贏餘一日畫出東封圖眼前百口怪神速背後十指爭
柳榆君家畫苑傾東都錦囊玉軸行盈車補完破碎收亡
逋欲得不計有與無問君此病何當祛君言無事聊自娛
世間何事非迷途挾策未必賢樗蒲苑中最愛文與蘇情
親不獨生同閭自謂知子誰知余叔也不癡回不愚憐君
用意常勤渠揮毫灑墨填空虛風梢雨葉出新意老樹僵
立何年枯我生百事不留意外物不足煩毆除翰墨纔能
記名字橫臨寫貌無工夫見弱不救危不扶獨無一物充
庖厨看君髮漆顏丹朱意氣健如生馬駒逢人不信六十
餘郁然一莖無白鬚呂公落寞起釣屠南山四老東宮須
人生晚達有如此應笑虞翻早著書

次韻應物有歎黃樓

一代蘇長公四海名未已投荒忘歲月積毀高城壘斯樓
亦何與與人壓復起紛紛徒爾爲長劍須天倚循分即可
久吾行誰與止邇來賢達人五十笑百里賴有寇公子衆
毀聞獨美直氣懾狂童牽聯皆可紀少公作長句班揚安
得擬頗有喜事人睥睨欲槌毀一朝陵谷變天語含潑旨
驚倒樓前人今朝有行履

和休文至自新安

無成底事到天涯重見春工換柳枝歷盡江山苦行役歸
來風雨過花時驅馳共厭人間世險阻時聞別後詩獨有
窮愁銷未盡一番相見一伸眉

次韻蘇公西湖觀月聽琴

公詩端王道亭亭如紫雲落世不敢學謂是詩中君獨有
黃太史抱杓挹其尊韻出百家上誦之心已醺黃鍾毀少
合大裘擯不文世事如病耳螳鬪作牛聞苦懷太史惠養
豹煙雨昏後世無高學舉俗愛許渾

城南

白下官楊小弄黃騎臺南路綠無央含紅破白連連好度
水吹香故故長蹲滑踏青穿馬耳轉危緣險出羊腸熟知
南杜風流在預怯排門有斷章

贈魯直

相逢不用早論交宜晚歲平生易諸公斯人真可畏見之
三伏中凜凜有寒意名下今有人習中本無事神物護詩
書星斗見光氣惜無千人力負此萬乘器生前一尊酒撥
棄獨何易我亦奉齋戒妻子以爲累君如雙井茶衆口願
其嘗顧我如麥飯猶足填饑腸陳詩傳筆意願立弟子行
何以報嘉惠江湖永相忘

放歌行二首

春風永巷閉娉婷長使青樓誤得名不惜捲簾通一顧怕
君着眼未分明
當年不嫁惜娉婷抹白施朱作後生說與傷人須早計隨
宜梳洗莫傾城

送李奉議亳州判官

吾友孫子實愛學吾所畏持身如處子得句有餘味交驩
艱難際凜然見名誼吾病卧里中車馬日一至遣醫饋梁

肉憂喜見顏際殷勤勸加飡代我破戒罪一別已三秋君
室乃其季輪困見眼中不作千里外因聲問何如胡不枉
一字

吾友張文潛君行乃其里當年釣遊處壯者或可指聞風
起遐想意作千古士不知塵土中奴推婢不齒胷中無一
塵筆下有百紙勿問見自知未語君已喜與遊今已後行
已勿停軌

陳詢秀才歸徐

千里相從愧子心未堪歸路馬駸駸更能作意憐衰病宜
復一作重來道古今三歲有期看一舉百年聊待到千尋
行逢淨社論餘習爲說登臨久廢吟

登彭祖樓

城上危樓江上城風流千載擅佳名水兼汴泗浮天濶山
入青齊煥眼明喬木下泉餘故國黃鸝白鳥解人情須知
壯士多秋思不露文章世已驚

遊鶴山院

積石橫成嶺行楊密映門人聲隱林杪僧舍遠雲根頓攝
塵緣盡方知象教尊只應羊叔子名字與山存南豐先生
出守日常
游是院

和南豐先生西遊之作

孤雲秀壁共崔嵬倚壁看雲足懶回睡眼賸緣寒綠洗醉
頭強爲好峰擡山僧煮茗留寬坐寺板題名卜再來有愧
野人能自在塵樊束縛久低徊

和南豐先生出山之作

側徑籃舁兩眼明，出山猶帶骨毛清。白雲笑我還多事，流水隨人合有情。不及鳥飛渾自在，羨他僧住便平生。未能與世全無意，起爲蒼生試一鳴。

和張次道再遊翠巖之作

去歲尋山有舊題，重來似與故人期。回巒俯仰如迎客，流水喧鳴擬索詩。嶺路依危通鳥過，吾身趁健白雲隨。自憐久快屠門嚼，欲住安能久茹芝。

和富中容朝散值雨感懷

節物驚心懶復嗟，樽中酒盡復誰賒。風撩雨脚俄成陣，雪閣雲頭欲結花。萬里可堪長作客，一年將盡未還家。自憐落落終難合，白首詩書謾五車。

謝贊閣黎見訪

好在談經老主人，衝風踏雪到江濱。百篇出篋自新得，一鉢隨身依舊貧。終歲杜門逃俗士，爲師設榻對修筠。蒲團藜杖焚香坐，此意此時無點塵。

和沈世卿推官見寄

倦看世態久低徊，且置窮通近酒杯。未忍一身閑處着，暫容雙眼醉時開。爲呼阿武扶頭起，擬與山公倒載回。好在東籬舊時菊，無心準擬白衣來。

和王明之見寄

末路相逢首重回，紫芝眉宇向人開。老來惟有風情在，事去空憐歲月催。憔悴不堪臨楚澤，棲遲無路上燕臺。少陵肺病疎杯斝，想負花前載酒來。

和酬施和叟宣德

山陰傾蓋兩綢繆十載重來髣已秋往事侵尋如昨日故人牢落半滄洲流離道路生涯拙蕪沒田園歲計休久要尚憐君子在爲言雞黍亦遲留

送澤之過維揚

夢裏揚州十載間青樓陳迹故依然袍爭爛錦催詩筆雨濺明珠落酒船顧我老無騎鶴興羨君行及看花天囊中繡句歸應滿不負韋郎五色牋

再到錢塘呈會宗伯益

負笈重來感舊遊流年衰髣兩經秋湖山依舊渾相識風月愁人不自由尚有故交重冷榻可堪歸夢到滄洲誰憐壯志空洞落百鍊今爲遶指柔

簡李伯益

壘壘度歲每無餘垂橐東歸口未餽貧裏交遊新斷絕老來光景半消除時情視我門前雀人好看君屋上烏尚喜敝廬連蔣願求佳句逋髯奴

九日無酒書呈漕使韓伯脩大夫

老大悲傷節物催酒腸枯涸壯心灰慙無白水真人分難置青州從事來倦筆懶從都市出醉眸剛爲麪車回黃花也似相欺得坐對空樽不肯開

過杭留別曹無逸朝奉

陳蕃解榻爲留連俯仰徒驚歲月遷故意斯人奈風雨多情於我獨山川可憐顏貌非前日依舊窮愁似去年後夜相思隔煙水夢魂空寄過江船

別威德寺

三宿城隈寺輕齋類老禪暫來真偶爾適去更翛然笑別
留春塲行尋下瀨船此身猶斷梗飄泊且隨緣

沈道院有水墨畫奇筆也惜其窮年無買之者賈
明叔請余同賦

壁間水墨畫為爾拂塵埃草樹精神出溪山氣勢回路從
沙嘴斷人自渡頭來莫怪知音少牙絃匣不開

和彥詹題遠軒

開窓得遠意興出杳冥間芳草日邊路片雲天外山好花
和露斲脩竹夾藤刪每許南鄰伴時來一寄顏

夜坐有懷一作秋懷

瑣瑣重門閉蕭蕭一再更一作稍稍昏烟短檠昏細字高
枕笑一作志平生來鴈防身早一作妨秋陽換眼明已須甘


酒力不用占時名一作永官鄰里舊心肯向人傾

馬上口占呈立之

廉纖小雨濕黃昏十里塵泥不受辛轉就鄰家借油蓋始
知公是最閑人



後山詩少



丹淵集鈔

廿一

文同字與可蜀梓州人初以文贊文潞公公譽重之繇
 是知名登皇祐元年進士為邛州軍事判官調靖難軍
 幕至和中召試館職判尚書職方兼編較史館書籍以
 親老請通判邛州尋改漢州熙寧中復入朝與執政議
 新法不合以論禮坐奪一官出知陵州徙洋州所至皆
 有政績代還判登聞鼓院數月出知湖州尋卒稱石室
 先生自謂有四絕詩一楚辭二草書三畫四且云世無
 知我者惟子瞻一見識吾妙處其詩清蒼蕭散無俗學
 補綴氣有孟襄陽韋蘇州之致與東坡中表每切規戒
 蘇門亦嚴重之不與秦張輩列送蘇倅杭云北客若來
 休問事西湖雖好莫吟詩蘇不能聽也世以為知言

早晴至報恩山寺

山石巉巖磴道微拂松穿竹露沾衣煙開遠水雙鷗落日
照高林一雉飛大麥未收治圃晚小蠶猶卧斫桑稀暮煙
已合牛羊下信馬林間步月歸

睡起

寥寥公館靜門掩似山家竹簟屢移枕石盤頻浸花開多
新得策事少早休衙一覺高春睡誰來伴試茶

織婦怨

擲梭兩手倦踏繭雙足踣三日不住織一疋纔可剪織處
畏風日剪時謹刀尺皆言邊幅好自愛經緯密昨朝持入
庫何事監官怒大字雕印文濃和油墨汚父母抱歸舍拋
向中門下相看各無語淚併若傾瀉質錢解衣服賈絲添

上軸不敢輟下機連宵停火燭當須了租賦豈暇恤襦袴
前知寒切骨甘心肩骨露里胥踞門限叫罵嗔納晚安得
織婦心變作監官眼

答公漑

晚泊咎公漑船頭餘落暉攜家上岸行愛此風滿衣村巷
何蕭條四顧煙火稀問之曰去歲此地遭凶飢斯民半逃
亡在者生計微請看林木下墻屋皆空圍好田無人耕惟
有荆棘肥至今深夜中鬼火流清輝衆稚聞此語競走來
相依錯莫驚且哭牽說求速歸

謝友人寄畫

客從長安來厚紙封小軸題云此奇畫寄贈公可蓄開之
掛高壁爛絹止一幅中有兩駱駝氣韻頗不俗大駝載半

丹淵集卷之二
騁正面頸愈曲小驢方就乳蹲身脚微踞一馬立其後纔
露頭與足三犬乃子母共卧嚼齧肉老 抱朱旗狀貌何
狼復端然立高岸勢若不可觸定是 中 華旃蓋鮮服
不知何所來隨從無一僕初誰作此畫精妙亦可錄應餘
右方在次第不止獨更願君訪來我官萬錢贖

夏日閑書墨君堂二首

先人有弊廬涪水之東邊我罷漢中守歸此聊息焉是時
五六月赤日烘遙天山川盡燦燥草木皆焦燃塵襟旣暫
解勝境乃獨專高林抱深麓清陰密石綿曾岩敞戶外淺
瀨流窗前邀客上素琴留僧酌寒泉竹簟白石枕穩處只
屢遷忽時乘高風遠望立雲烟野興極浩蕩俗慮無一緣
氣爽神自樂世故便可拍却憶爲吏時荷重常滿肩几案

堆簿書區處忘食眠冠帶坐大暑額汗常涓涓每懼落淡
責取適敢自便安閑獲在茲况若夢游仙行將佩守符復
爾趨洋州山中豈不戀事有勢外牽尚子願未畢安能賦

歸田

歸來山中住便作山中人冠帶亦自閑累月不着身散髮
層巖阿濯足清澗濱石薜黏簡冊松風墮衣巾鄉里多舊
游不厭過從頻山肴與野醜待我如佳賓有召卽走赴愛
其愛我真常恐禮數乖取問吾交親正此一夏樂忽茲邁
蕭辰還愧擁千騎又走西道塵

重過舊學山寺

當年讀書處古寺擁羣峰不改歲寒色可憐門外松有僧
皆老大待客轉從容又下白雲法樓頭敲莫鐘

閑樂

晝睡忽過午好風吹竹牀溪雲生薄暮山雨送微涼粉裏
衣裳潤蘭薰葦席香歸來閑且樂多謝墨君堂

晚至村家

高原磽确石徑微籬巷明滅餘燐暉舊裾飄風採桑去白
裕卷水秧稻歸淡菽繞澗牛散卧積麥滿場雞亂飛前谿
後谷暝煙起稚子各出關柴扉

過友人谿居

籬巷接菰蒲閑扉掩自娛水蟲行插岸林鳥過提壺白浪
搖秋艇青煙蓋晚厨主人誇野飯爲我煮新蘆

江上主人

客路逢江國人家占畫圖青林隨遠岸白水滿平湖魚小

猶論尺鷃輕欲問銖何時遂休去來此伴潛夫

極寒

燈火宜冬杪圖書稱夜長簾鈞挂新月窗紙漏飛霜酒醴
慙孤宦皮毛逐異鄉誰知舊山下梅艷滿東墻

六月十日中伏玉峰園避暑值雨

南國避中伏意適晚忘歸墻外谷雲起簷前山雨飛興餘
思秉燭坐久欲添衣爲愛東窗下泉聲通翠微

訪李真山人隱居

多暇無所適故來尋隱君寧開壓屋樹觸散擁門雲狀貌
不妨古言談何太文令人重高趣歸去每斜曛

安仁道中早行

行馬江頭未曉時好風無限滿輕衣寒蟬噪月成番起野

鴨驚沙作隊飛揭酒旗當岸立翩翩魚艇隔灣歸此間
物象皆新得須信詩情不可違

面川亭

幽亭最孤絕直入亂叢間近晚獨來此有誰相與閑卷簾
通大野臨檻數前山便欲教攜酒陶然踏月還

北郭

繞樹垂蘿陰曲堤暖煙深處亂禽啼何人來此共攜酒可
惜拒霜花一谿

讀史

不得榮陽遂失秦始知成敗盡由人可憐一擲贏天下只
使黃金四萬斤

夜學

已叨名第雖堪放未到根源敢效林文字一淋燈一盞只
應前世是淡讐

冷餅

海南有陶器質狀燔而楷云初日炙就鍛鑠不以火水壺
醜突兀酒甕肥礫柯山疊頭微腫石鼎足已跛圓如鴨夷
形大比康瓠顯華元腹且皓王莽口何哆蕃胡入中國萬
里隨大舸攜之五羊市中置費何裹休離講其效瀉辯若
炙輅課以沸泉沃水雪變立可炙敲療中渴其用豈么麼
君凡幾錢得不惜持遺我曾將對佳客屢試輒亦果勿云
遠且陋幸可置之左

中秋夜試院寄子平

憶初我來時夜色如墨障心常念明月幾日西南上松梢

倚樓角一映偃相向漸見輪中物
依稀吐形狀今宵東嶺
外灑灑金波漲人間重此夕一詩
號佳賞而我督秋試鏤
宿密如藏細務紛滿前約束甚難
軟無由奉朋侶徹曉坐
清曠之人富才華筆力趨且壯
陪把樽酒露下與酬唱
南牆咫尺地使我起遐想人生
良會可惜已虛放獨立
中夜歸倦首入書幌

成都楊氏江亭

汀洲煙雨卷輕霏遙望軒窗隱
萬嶺西來共曉色一
江南下載晴暉鳧鷖慣入闌干宿
魚蟹長隨解艇歸我亦
舊多滄海思幾時如此得苔磯

無為山寺

一組危磴遶崢嶸上徹幽淡入化城
煙外川原誰繡畫雲

中樓閣自陰晴老僧高論都無著
古佛真身宛若生聞道
軍持新呪水願傾涓滴洒塵纓

郡學鏤宿

長栢高栢蔭廣庭夜涼入靜夢魂
清不知山月幾時落每
到曉鐘聞雨聲

月崑齋又言累石為山上有
一峰穿竅如月謂之月

崑齋詩中子平即子瞻也

月為太陰精石亦月之類月常竅
字於石中事理如此何
足異天地始分判日月各一物既
名物乃入形器安有形
器不消沒况此日與月曉夜東西
走珠流壁轉無暫停豈
與天地同長久其為勞苦世其知
惟是月有生死時既然
須常換新者人但不見神所為
須上天生月必地中產

君不見孺陽縣之山谷間纔成未
就知何限石有不才者
往往其卵蝦靈媿棄置不復惜任
人取去爲珍玩佳者留
之待天取藏滿庫樓千萬許彥瞻
博物天下稱更無定不
以予之說爲寤語予恐世人不知
嵩丘崑洞中中有八萬
二千脩月戶其所食盡玉屑昔有
王生見之滿襍提斤
斧應是當年靈鷲山直自天竺飛
落西湖前其上有石姓
月月已滿此人竭來就彼剝剔歸
上天所以此石拆臨不
復合至今神胞所附之處其痕圓
拋擲道傍凡幾歲風刷
雨淋塵土穢子平一見初動心輦
致東齋自摩洗更選他
山相擁列就中獨爾一峰最奇絕
每至瑤魄流光下照特
玉柱橫歎無少缺子平謂我同所
嗜萬里書之特相寄邀
我爲詩我豈能窗前累日臨空紙
遙想崑前寶穴通玉蟾

從此去無蹤請君爲我細書字側名爲月母峰

和提刑度支王店雞詩

王店有郵吏養雞殊可笑昂然處高襟不肖以時器官有
宿此者西征待初曉雞竟不一鳴問吏吏已告云此最荒
絕左右悉蓬蓼狐狸占爲宅恣橫不可道前此三四雞一
一遭其暴尋聲卽知處盡獲爪牙弔自後始得此其若有
人教東方或未明群醜尚騰趨此雞但錯結直伺太陽耀
雖然謂失且似得保身要官曰此何用不然則宜糶不見
不鳴鴈先死蓋自召天下已明白豈假更喧鬧徒爾費稻
梁曾莫知所報吏云官言是且顧忽嘲誚知是本在人此
物何足校

送棋僧惟照

學成九章開方訣誦得一行乘除詩自然天性曉絕藝可
敵國手應吾師窗前橫榻擁爐處門外大雪壓屋時獨翻
舊局辨錯著冷笑古人心許誰

送龐中秀才

曼倩學精知蜥蜴公明術妙識蜘蛛臨邛復有龐成叔萬
事先將入卦圖

遣興效樂天

君莫學楊虞欽奉李宗閔宗閔權勢豈能久君莫學劉栖
楚附李逢吉逢吉祿位寧長守雖然一時身暫好其奈千
古名常醜丈夫讀書要知道所信不篤被其誘大張富貴
作羅網愚者紛紛以身就左纏右繞不可脫誅竄還當逐
其後君不見虞卿須遇李固言君不見栖楚終遭韋處厚
一朝摧折靈氣盡龍如蛇兮虎如狗勸君聖賢術內好潛
心勸君邪佞黨中休入手豈不知潞州處士田佐時與與
美官嫌不受

野迳

山圃饒秋色林亭近晚晴禽蟲依月令藥草帶人名排石
鋪衣坐看雲緩帶行官閑惟此樂與世欲無營

寄何首烏丸與友人

此草有奇効嘗聞於習之陵陽亦舊產其地尤所宜翠蔓
走崑崙芳叢蔚參差下有根如拳赤白相雌雄斲之高秋
後氣味乃不虧斷以苦竹刀蒸曝凡丸爲夾羅下香屑石
蜜相和治入臼杵萬過盈盤走纍纍日進豈厭屢初若無
所滋漸久覺膚革鮮潤如凝脂既已鬢髮換白者無一絲

耳目固聰明步履欲走馳十年親友別忽見皆生疑問胡
得爾術容貌曾莫衰爲之講靈苗不爲世俗知蓋以多見
賤蓬藿同一虧君如聽予服此語不敢欺勿信柳子厚但
誇仙靈脾

秋日田家

海澱溝源築野塘滿坡煙草卧牛羊今年且喜輸官辦豆
夾繁多粟穗長

可笑口號七章

可笑庭前小兒女栽盆貯水種浮萍不知何處聞人說一
夜一根生七莖

可笑陵陽太守家閑無一事只栽花已開漸落并纔發長
作亭中五色霞

可笑此公何太惑讀書寫字到三更也知學得終無用自
官辛勤比後生

可笑生平事迂濶向人不可強云云到頭官職難遷轉一
似城南蕭次君

可笑爲官太微幸養恩藏拙在深山君看
處置繁難者日
夜經營心不閑

可笑兒孫亦滿眼朝朝庭下立參差謂言
飽讀詩書去樵
悴如翁亦好爲

可笑山州爲刺史寂寥都不是川城若無
書籍兼圖畫便
不教人白髮生

山城秋日野望感事書懷詩呈吳龍圖
已是秋陰更夕曛亂山高下起寒雲危樓
頗見客何處遠

笛不知人厭聞身外流年波渺渺眼前生
萬斛誰量得直爲重檢瘦信文
華葉紛紛此愁

子平寄惠希夷陳先生服瘡福山藥方因戲作雜言

謝之

蜀江之東山色盡如赭有道人云此是丹砂伏其下煙雲
光潤若洗濯澗谷玲瓏如刻畫我聞神仙草藥不在凡土
生是中當有靈苗異卉之根莖果然人言所出山芋爲第
一西南諸郡有者皆虛名就中唐福衆稱賞肥實甘香天
所養有時嵩頭倒垂三尺壯士臂忽然洞口直舉一合仙
人掌上入冬農事閑千篝萬鍾來此山可憐所鬻不甚
貴着價卽售曾不慳往年子瞻爲余說言君所部之內此
物尤奇絕後復寄書勸我當餌之漭紙親提華嶽先生訣
予因購之不惜錢依方服餌將二年其功神聖久乃覺牙
牢體溢支節堅自問丹霄幾時上早生兩翅教高颺塵世
如帑不可居待看鴻濛對雲將

貧居

繩牀擁敝裯初起髮未櫛南窗展書卷就暖讀寒日門前
絕車馬薄暮垂片席短墻挂織蔓幽鳥啄紅實羣蝸惡積
雨繚繞篆空壁男兒處貧賤舉首宇宙窄翩翩槍榆鳩宛
轉匿蚤蝨妻奴競相笑憔悴守文筆

江原張景通善頌堂

庭前雲蓋碧巉崑堂上先生雪滿髯說藥客來聊下榻謁
齋僧去便垂簾種時法好花難謝買處錢多石易添子舍
光榮身仕健只將香火事華嚴
雲蓋堂下第銘

寄宇文公南 自文州曲水令藥官

彭澤長謠便歸去君辭曲水亦其徒一言何藉五斗米二
子况皆千里駒懶對俗人常答颯厭聞事但盧胡從來
綿竹多賢者惟是楊雄失壯夫

送潘司理秘校

已自多時賦式微五峰佳景夢長飛四年遠地為官去萬
里高堂喜客歸下馬便呈新授勅開箱緡認舊縫衣鄉人
覓次來相賀萼菜鱸魚正軟肥

又五言

曲棧繞斜谷鉤欄天際分吟鞭搖嶺月倦枕拂浮雲好景
不關俗新詩皆屬君西南有歸客一一幸相聞

清景堂

公外拍塵慮閑中見物情萸花紅炬密竹節粉環輕燕泊
簾鉤語蜂尋筆架鳴靜能知此趣吃吃笑勞生

呈李堅甫中舍 祀

往年曾憶過長安短紙書名詣門下君時延我坐終日酒
掃東軒留看畫橫圖巨軸不知數但見匣中時一把甲猶
未竟乙復作門類著番開滿架使人歎羨不能已只恨有
門歸隔夜歸來兀坐想精絕念此榮觀若為謝就中寒林
兩大幅此物世間誰敢價倏然一別十五載常向人前盛
誇詫因君奉使臨敵邑見先問此餘不暇君能為我再講
說座上不容人俗話如君所蓄更誰有有亦未能無笑罵
况君累世盡清職摹本敢來前弄詐君今還省正擢用異
日須求作鄰舍我中曳履日相謁更欲重煩開絕吧待尋

前輩用心處款曲應須頻假借每厨閱訖當便還不敢奉欺言羽化

采芡

通判盧微之攜種種芡次年大盛

芡盤團團開碧輪城東壕中如疊鱗漢南父老舊不識日
日岸上多少人駢頭鬚鬆露秋熟綠刺紅針割寒玉提籠
當筵破紫苞老蚌一開珠一掬吹臺北下疑祥池圃田東
邊僕射改如今兩處盡湮沒異日此地名應馳物貴新成
味尤美可惜飄零還入水料得明年轉更多一匝清波流
珠子

峰鐵峽

東風吹空力何短三月隴山全未暖文法姦引騎兵飛
隨銀鵬弓刀滿霜矛雪甲寒如水候卒何由知首尾君不

見峰鐵峽頭雲色死一過蕭然五十里

北齋雨後

小庭幽圃絕清佳愛此常教放吏衙雨後雙禽來占竹秋
滾一蝶下尋花喚人掃壁開吳畫留客臨軒試越茶野興
漸多公事少宛如當日在山家

凝雲榭晚興

晚策倚危榭羣峰天際橫雲陰下斜谷雨勢落褒城遠渡
孤煙起前村夕照明遙懷寄新月又見一稜生

山堂偶書

幾日無公事山堂興頗清和詩防積壓丸藥趁晴明斲石
新稜出澆蔬晚甲生此皆忙外得低首笑塵纓

將赴洋州書東谷舊隱

丹雘集鈔

十二

晚客無一來獨步入東谷園林已成就此景頗不俗落落
巖畔松脩脩澗邊竹爽氣逼襟袖清如新出浴寒泉激亂
石磊磊漱瓊玉荒溪漬餘潤滿地苔蘚綠珍禽靜相倚毛
羽華且縵高下相和鳴不去若馴伏幽花雜紅紫點滴亂
盈目坐久微風來時聞散餘馥往年讀書處宛爾舊茅屋
雖然小破壞脩整可數木開門拂軒窗無限起蝙蝠縱橫
列蟲網不免自掃撲壁間細書字多是親寫錄當時苦謀
身如此用意毒于今三十年才抵羊髀熟一從入仕路行
步每踏蹶所畏惟簡書其甘者藜藿中間何大幸致身在
天祿無狀陪後游倪首常自慙連章乞外補得郡悉鄉曲
雖名二千石敢自辭碌碌朝廷設新法布作天下福或慮
多垢玩訓戒稍嚴肅刺史當是時能不為驅督行之以中

道勉副議者欲刻薄素所憎忍復用刑獄進身豈不願實
懼有陰戮昨從漢中歸於此度炎燠親朋日相會分誼愈
敦篤便欲從之遊投簪解朝服退自數年計伏臘殊未足
還當武康去就養若雞鶩貧雖士之常於我何迫蹙簞瓢
若自具尚可繼前躅奈何食口衆不比回也獨東方千餘
騎導從催我速行復登長途貌展心甚縮淵明豈俗士幸
此有松菊

崔觀詩 大中時人

崔觀者高士梁州城固人讀書不求官但與耕稼親夫婦
既已老左右無子孫一日召奴婢盡以田宅均俾之各爲
業不用來相聞遂去隱南山雜跡麋鹿羣約曰或過汝所
給爲我陳有時攜其妻來至諸人門乃與具酒食嘯詠相

歡忻山南鄭餘慶辟之爲參軍見趣使就職漫不知吏文
已復許謝事但謂長者云補闕王直方本覲之比鄰文宗
時上書召見蒙咨詢薦覲有高行用可追至淳詔授起居
郎哀斜走蒲輪辭疾不宥至高風槩秋旻我昨過其縣徘徊
回想芳塵訪問諸故老寂無祠與墳斯人久不競薄夫何
由敦此縣漢唐時諸公揚清芬刻詩子堅廟來者期不泯

翡翠

清晨有珍禽翩翩下魚梁其形不盈握毛羽鮮且光天人
裁碧霞爲爾縫衣裳晶熒炫我目非世之青黃愛之坐良
久常恐瞥爾翔忽然投清漪得食如針鋒如是者三四厭
飫已一肱旣飽且自嬉翻身度回塘飛鳴逐佳匹相和音
琅琅是時鳧與鴈狼藉鳥嶼旁蒲腹釀腥穢紛紛晒晴陽
鶯鷦最麤惡背大脚脰畏入水捕地解淤泥亦時將想其
見爾時一喙亦爾傷其心宵謂爾被體凝華章勸爾慎所
止好醜誰同鄉清溪多鰾鮮亦足充爾腸江海菰且澗所
獲未可量爾當事深劇帶圃參鸞凰

晚泊金牛

一襟初覺晚霜清短鞵垂頭任馬行斜日斂回疎木影急
風收斷落泉聲望窮好景番番別題徧新詩闕闕精終是
故人伏潘令許多才調賦西征

寄子駿運使

時按西鄉

西鄉巴嶺下嶮道入孱顏使騎到荒驛野禽啼亂山問民
青靄裏訪古白雲間幾日南
路新詩滿軸還

寄景孺提刑

子尚書

十四

江由崑嶮地萬木與雲齊
弭節山中宿思歸夜半啼麝香
霑野草虎跡滑春泥
到是須憑酒何人手可攜

往年寄子平

往年記得歸在京日日訪子來
西城雖然對坐兩寂寞亦
有大笑時相轟顧子心力苦
未老猶弄故態如狂生書窗
畫壁恣掀倒脫帽褫帶隨縱
橫誼歌詩器文字蕩突不
管鄰人驚更呼老卒立臺下
使抱短簫吹月明清歡居此
僅數月夜夜放去常三更別
來七年在鄉里已忝三度移
雙旌今茲惛惛意思倦加以
跼跼疾病嬰每思此樂一絕
後更不逢人如夜行

依韻和蒲誠之春日卽事

輕煙漠漠雨斜斜無事常教放
雨衙問客江邊求好石倩
人山裏覓奇花新蔬宛宛生
晴圃淺澗涓涓出暖沙入夏
盃盤須准備繞畦親灌邵平瓜

木瓜園

驅馬下高岡吟鞭只自揚
溪山過新霽草木發清香浩蕩
來江濶縈紆去棧長春風吹欲
盡樽酒嘆何嘗

水磴

激水爲磴嘉陵民構高穴
溪良苦辛十里之間凡共此
麥入麵出無虛人彼畦居險
所產薄世世食此江之濱朝廷
遣使興水利嗟爾平輪與側輪

長舉駟樓

爽氣浮空紫翠濃
隔江無限有奇峰
君如要識營丘畫請
看東頭第五重

柳溪贈丁綰

塲屋聲名四十年五車書誤一囊錢老來山驛爲監吏相
對春風但惘然

此君庵

與班墮籜開新筠粉光璀璨香氣氤我常愛君此默坐勝
見無限尋常人

晉銘

長安驚碑者遺我古鼎銘不知其所來有眼實未經凡百
十九字詭怪摹物形縱橫下點畫不類子與丁試考諸傳
說其源已冥冥宣王石鼓文氣韻殊飄零始皇嶧山碑骨
骼何玲竅我恐鬼哭時正爲此物靈安得不死神提去詢
大庭爲我譯其辭讀之駭羣聽

秦詔

山流濯幽阮銅篆發古耀我行奉天縣與以百錢糶讀之
迺二世元年所刻詔謂法度量者盡始皇帝造辭止曰皇
帝久遠若爲道乃命斯去疾具述紀其右文章旣精簡字
畫亦佳妙亥爾何等人敢作萬世調其爲者非是所累纔
一廟區區頌微末回首皆可吊郡兵厭寶玉得此只揮掉
漂流落荒壤千載厄潛與乃知天宇內事有不可料此物
今何爲惟助觀者笑

謝楊侍讀惠端溪紫石硯

學文二十年語氣殊未成所以文房中四譜無一精豈不
願收貯竊恐好事名自愧中稿然敢假外物榮前日下秘
閣謁公來西城公常顧遇厚待以爲墨卿延之吐佳論出

日無雜聲語次座上物現有紫石英云在嶺使得渠常美
其評因取手自封見授囑所擎倉皇奉以拜其喜懷抱盈
歸來示家人衆目擊且驚言並我所有瓦礫而瑤瓊貴價
市珍煤風前試寒泓磨知密埋潤點覺浮光清洗濯鑑面
瑩彈扣牙音鏗遂剪十襲巾加以重篋盛客來有欲觀稍
俗不敢呈願傳之子孫更重金滿籬作詩叙嘉貺慙比毫
毛輕

西岡做屋

出官在秦蜀始末凡十年所治得公宇靡不完且堅中堂
與挾廊角翼相鈎聯領屬僅十口出處皆安便冬夏惡風
日侵薄曾無緣今年歸中都職事叨磨鈔未免做屋住敢
謂須華鮮西岡頗幽僻愛此遠市塵間得王氏居十楹月

四千牀榻案几外空處無一椽匣瀾及井竈圻壁皆相連
經痺須俛首過隘常側肩所謂十口者日繞蝸殼旋前時
大暑中幾不禁神延鬱若鼎釜炊局如狴犴學走蝸過亂
蟻飛蚊劇羣蟬今日幸過之復畏明日然喜見白露節相
賀肌肉全如何下淫雨曉夕常綿綿瓦破椽棟漏柱陷墻
垣穿惟供改席坐豈暇安枕眠中庭止數步浚已可載船
盡室徒跣行一起復一顛京師費耗地居止實重遷俸料
計月入外得無幾錢却思已過分僅免親犁田自望于古
人若地而升天小廬焦生高陋巷顏子賢引之論妻孥吾
道宜此焉猶勝比鄰者寒突無晨煙

閩鄉值風

烈風吹華陰古槐若長呼高沙起黃磧四望如一鋪上馬

大淵集金 十七
低便回據鞍兀長途日晚過潼關行客亦已疎守吏索姓名沸亂如蟲蛆兩目不可開說之使自書夜至闕鄉縣僮僕相欹歎坐定卽洗濯泥土捫短鬚草草具盤餐零落飯與蔬恨無姜少府爲膾黃河魚

積雨

京師值積雨浮淖皆滿城况當洶決時左右羅溪坑有客南河居且夕隄上行病僕挾羸馬十步八九傾職事有出入長抱落膽驚都人素豪恣小官常見輕排闥要穩道斂避不敢爭試欲效呵止園目根姓名往往被濺汚直落舌與晴歸來事洗濯袍袴分縱橫仰首問天公春澤當早晴幸有好日月何惜施光明

大熱過散關因寄里中友人

六月日正午大暑若沸鑊時行古關道十步九立脚煙雲炙盡散樹木晒欲落喉鼻喘不接齒舌津屢涸擔血僮破額鞍汗馬濡膊幽坑困猿狖密莽渴鳥雀至此因自謂胡爲就名縛所利緣底物奔走冒炎惡塵心日夜迫欲往不能略因念于故園左右悉林薄昔我未第時此有文酒樂長松借高蔭飛瀑與清濯層崖對僧詠大石引客酌畏景雖赫然無由此流爍于今只夢想欲往途路邈所效殊未立期歸尚誰約徒爾發短歌西首謝巖壑

送張宗益工部知相州

學術澆沉久未施晚登臺省世方知詩章好奏周文廟字法宜磨魏武碑禁掖便當提大筆名藩猶自擁高麾應憐共試金坡者答颯渾如鄭鮮之

送王恪司門知絳州

絳守園池天下誇，紹述有記詞。聳牙蒼官青士，左右樹神君。仙人高下花，遠水依然尚。鈎帶舊門想已無，鞞樞自憐俗狀不能到此去。羨君專宴衙。

新霜

新霜着庭樹，葉下如猛剝。蕭然物容改，有若懼凌挫。砌下丹橋落，牆邊紫榴破。精光竹勁健，沮喪柳怯懦。覽景惜向暮，感時驚忽過。勝事實可樂，閑愁本堪唾。何當共往客，對此酌香糯。

紅樹

萬葉驚風盡卷收，獨餘紅樹擬禁秋。已疑斷燒生前嶺，更共殘霞入遠樓。楓岸最淡霜未落，柿園渾變雨初休。勸君

莫上青山道，粧點行人分外愁。

鄧隱老木寒牛

蒼崖稜層草芊綿，巨木半死生枯壘。羸牛日晚已噉草，稚子天寒猶打錢。

蒲生鍾馗

寒風酸號月慘苦，梟飛狐鳴滿墟墓。叢棘亂礪翳野霧，古社禿剝倒枯樹。下有三鬼相嘯聚，初行誰家作疰忤。痛熱腫痒快嘔吐，塞噎咽喉脹臍肚。呼巫召覲使呪詛，翁驚媼忙設賽具。茅盤草船置五路，飯盂炙串狼籍布。相共收斂各執去，方此危坐歎且哺。忽爾相視生畏怖，有神傑然駕巨牯。前呵後擁役二豎，此神噉鬼充旦暮。其腹尚餒色躁怒，鬼遙見之悉失措。竄匿不暇相告諭，酒傾肉落雜穢汙。

魄魄飛蕩身偃仆一入木底只四據一尚把盞愕以顧一
自隱蔽振眦覲神用氣攝縛束固前死入吻無十步計之
嚼嚙或味飲蒲生胡為適爾遇畫之蒲卷無一誤筆墨醜
怪實可懼持以贈余子何故搖手不取一錢賂他日乞詩
者尤屢試為言之寫其故

謝任瀘州師中寄荔支

有客來山中云附瀘南信開門得君書歡喜失鄙吝筠筴
包荔子四角俱封印童稚嘗聞之羣來立如陣競言此佳
果生眼不識認相煎求拆觀顆顆紅且潤衆手攫之去爭
奪遞追趨貪多乃為得廉耻曾不論喧鬧俄傾問咀嚼一
時盡空餘皮與核狼籍入煨燼

襄陽詩鈔

廿二

米黻自云黻卽芾也故亦作芾字元章太原人徙居襄
陽號襄陽漫仕後徙居吳以母侍宜仁后藩邸舊恩補
臨光尉歷知雍丘縣連水軍使太常博士知無為軍召
為書畫學博士賜對便殿上其子友仁楚江清曉圖擢
禮部員外郎出知淮陽軍本解音律象緯善屬文作韻
語要必已出為工務崖絕無壘悟竹簡以竹聿行漆故
篆籀法特古作字適勁奇峭畫山水人物自成一家極
江南煙雲變滅之趣晚以研山易北固園亭名海嶽庵
淨名齋又作寶晉齋因號海嶽外史又以曾監中嶽廟
號中嶽外史自稱家居道士有潔癖世謂水淫任太常
奉祀太廟洗去祭服藻火坐是被黜冠服作唐人所好

多違世異俗故人皆稱米顛嘗作詩云飯白雲留子茶
甘露有凡人叩之曰只是甘露哥哥耳王安石愛其詩
摘書扇上東坡云元章奔逸絕塵之氣超妙入神之字
清新絕俗之文相知二十年恨知公不盡答曰更有知
不盡處其風致可想也有山林集十卷恨未見其全

垂虹亭

斷雲一葉洞庭颿玉破鱸魚霜破柑好作新詩寄桑苧黍
虹秋色滿東南

題多景樓

欲雨氣不透庭梧有棲煙回首望北固雲藏淨名天呼童
遶具輿憑高覽山川隱見豈不好開霽景固全須與江風
流湛湛清露圓歸途知有伴華月上丹淵

音巖

秦駟禹鑿已寥寥却爲高人得姓焦鮑餌有時邀楚釣海
雲常覺護山樵巖多陰霧龍藏角虹絳蒼林玉露臙濁氣
不侵靈呪下方壇曾駐紫清飈

題泗濱南山石壁曰第一山

京洛風沙千里還船頭出汴翠屏間莫論衡霍撞星斗且
是東風第一山

山光寺

竹圍山徑晚風清又入山光寺裏行一一過僧談舊事遲
遲繞壁認題名仙來石畔懷灰劫鶴語池邊勸後生三十
年間成底事空明閒祿是榮身

望海樓

雲間鐵瓮近青天，縹緲飛樓百尺連。
三峽江聲流筆底，六朝帆影落樽前。
幾番畫角催紅日，無事滄洲起白煙。
忽憶賞心何處是，春風秋月兩茫然。

題子敬范新婦唐摸帖

貞觀款書丈二紙，不許兒奇專婦美。
何為寥寥寶是似，遭亂歸貞火兼水。
千年誰人能繼趾，不是名家殊未智。
嗟爾方來眼次洗，玉躡金題羊歸米。
雲物龍蛇森動紙，父子王家真濟美。
張翼小兒寧近似，滄溟浩對蹄涔水。
騰蛇無足鼯多趾，以假易真信用智。
龜澣雖多手屢洗，卷不生毛誰似米。
真裂紋紙，紙跋印多時俗眼美。
誠懸尚復誤疑似，有渭不能辨涇水。
真為頭面拳跌趾，久假中分辨愚智寶社。

開時心一洗，百氏何人傳至米。

濮王宗漢作，蘆鴈有佳思，贈以詩。

偃蹇汀眠鴈，蕭梢風觸蘆。
京塵方滿眼，速為喚花奴。
楚趣分茗水，風光剪雪湖。
塵中不作惡，為有鄴公圖。

俞薛紹彭

世言米薛或薛米，猶言弟兄與兄弟。
四海論年我不卑，品定多知定如是。

謝劉涇

唐滿書奩，晉不收却緣。自不信雙眸發，狂為報篆龍子不。
怕人稱米薛劉。

擬古

青松勁挺姿，凌霄耻屈盤。
種種出枝葉，牽連上松端。
秋花

起絳煙旖旎雲錦殿不羞不自立舒光射九九柏見吐子
效鶴疑縮頸還青松本無華安得保歲寒

龜鶴年壽齊羽介所托殊種種是靈物相得忘形軀鶴有
冲霄心龜厭曳尾居以竹兩附口相將上雲衢報汝慎勿
語一語墮泥塗

秋登峴山之作

皎皎中天月團團徑千里震澤乃一水所占已過二安羅
卽峴山謬云形大地地惟東吳偏山水古佳麗中有皎皎
人璫衣玉爲珥位惟列仙長學與千年對幽操久獨處迢
迢願招類金颺帶秋威歛逐雲檣至朝隔輿馭颺暮過光
浮袂雲育有風駟蟾蜍有刀利亭亭太陰宮無乃瞻星氣
興深夷險一理洞軒裳僞紛紛夸俗勞坦坦忘懷易浩浩

將我行蠢蠢須公起

西山書院丹徒私居也上皇樵人以異石來告余凡
八十一穴狀類泗淮山一品石加秀潤焉余因題
爲洞天一品石以麗其八十一數令百夫輦致寶
晉齋又七日甘露下其石梧桐柳竹椿杉蕉菊無
不霑也自五月望至廿六日猶未已因思之作此

詩

我思岳麓抱黃閣飛泉元在半天落石鯨吐出流一里赤
日露下陰紛薄我曾坐石浸足眠肘項抵水洗背肩客時
救我病欲死一夜轉筋着艾燃如今病渴擁爐坐安得縮
脚三十年重往石上浸足眠

甘露寺

六代蕭蕭木葉稀樓高北固落殘暉兩州城郭青烟起千
里江山白鷺飛海近雲濤驚夜夢天低月露濕秋衣使君
官負時平樂長倒金鍾盡醉歸

答劉巨濟

劉郎收書蚤甚早折枝花草首徐熙十年之後始聞道取
吾韓戴爲神奇邇來白首進道奧學者信有髓與皮始知
十襲但遮壁牛馬便可裹弊帷錢峩太平老寺主白紗冒
首無冠鞋武士後列肅大劔宮女効侍輝脩眉神清眸子
知寡欲齒露脣反法定飢世人觀服似摩詰不知六朝居
士衣後人勿把亂唐突梁時筆法了可知道子見之必再
拜曹劉何物望藩籬本當第一品天下却緣顧筆在漣漪

潤州甘露寺

邑故重重構春歸戶戶嵐槎浮龍委骨畫失獸遺耽神護
衛公塔天留米老庵栢梁終厭勝會副越入譚

雜詩

揚清歌發皓齒北方佳人東鄰子且吟白紵停綠水長袖
拂面爲君起寒雲夜卷霜海空風吹天飄塞鴻玉顏滿
堂樂未終館娃日落歌吹濃絃歌興罷拂衣還棄米何嘗
有俸錢恩自大釣能逐物只應訪藥是優賢

寄薛郎中紹彭

老來書興獨未忘頗得薛老同徜徉天下有識誰鑒定龍
宮無術療膏肓淮風吹戟稀訟牒典客閉閣閑壺漿吟樹
對山風景聚墨池濯硯龜魚藏珠臺寶氣每貫月月觀桂
實特飄香銀淮燭天限織女烟海括地生霧光雋兒乃是

翰墨侶挾竹不使輿衛將象管鈿軸映瑞錦玉麟斐凡鋪
雲肪依依煙葦動勃鬱矯矯龍蛇起混茫持此以爲風月
伴四時之樂渠未央部刺不糾翰墨病聖恩養在林泉鄉
風沙漲天烏帽客胡不東來從此荒

歐怪褚妍不自持猶能半蹈古人規公權醜怪惡札祖從
茲古法蕩無遺張顛與柳頗同罪鼓吹俗子起亂離懷素
獮獠小解事僅趨平淡如盲醫可憐智永硯空白去本一
步呈千唾已矣此生爲此困有口能談手不隨誰云存心
乃筆到天工白是秘精微二王之前有高古有志欲購亡
高貲殷勤分治薛紹彭散金購取重跋題

奇紹彭

蕭李駮子弟不收慰問帖妙迹固通神水火土更劫所存

慰問者班班在箱笈使惡乃神護不然無寸札自此輒畫
相後人眼徒攝

揚州

東風何索寞帶雪入揚州尚想遺釵雀重觀上玉鈎真同
一夢覺空憶十年遊邂逅逢孫楚酣歌慰滯留

竹西寺

竹西桑柘暮鴉盤特地霜風滿倦顏不用使君相料理都
緣塵土蔽青山

貞孃墓歌

何不學仙冢纍纍白楊西郭陰風悲虎丘一叩貞孃墓薛
荔援牆委蘭露千歲蒙茸幾樹花夜飄鬼火曉啼鴉向憐
挾瑟彈清月猶憶吹簫乘彩霞吳閭少年往來道黛娥釵

燕誰能好酒滴春雲夢不消泉聲幽咽鐘聲老陌上行游
緩緩歸昨日紅顏今日非東望闔閭穿葬處玉鳧欲化湛
盧飛

余嘗礎越竹光滑如金版在油拳上短截作作軸入
笈番覆一日數十張學書作詩寄劉薛

越筠萬杵如金版安用杭油與池繭高壓巴郡烏絲欄平
欺澤國清華練老無他物適心日天使殘年同筆研圖書
滿室翰墨香劉薛何時眼中見

將之茗溪戲作呈諸友

松竹留困夏溪山去爲秋久賡白雪詠更度采菱謳縷玉
鱸堆案團金橘滿洲水宮無限景載與謝公游
半載依修竹三時看好花懶傾惠泉酒點盡壑源茶主席

多同好羣峰伴不譁朝來還盡簡便起故巢嗟

余居半載諸公載酒不輟而余以疾每約置膽清話
而已復借書劉李周三姓

好懶難辭友知窮豈念通貧非理生拙病覺養心功小圃
能留客青冥不厭鴻秋帆尋賀老載酒過江東
仕倦成流落游頻慣轉蓬熱來隨意住涼至逐緣東入境
親疎集他鄉彼此同暖衣兼食飽但覺愧梁鴻
旅食緣交駐浮家爲興來句留荆水話襟向卞峰開過剡
如尋戴遊梁定賦枚漁歌堪畫處又有魯公陪
密友從春拆紅薇過夏榮團枝殊自得顧我若含情漫有
蘭隨色空無石對聲却憐皎皎月依舊滿船行

與薛老

何必識難字辛苦笑楊雄自古寫字人用字或不通要之
皆一戲不當問拙工意足我自足放筆一戲空

蕭閒堂詩并叙

四明從事晉陵錢君世系字延叟過襄陽米芾曰昨送
季濟民渡江與汪行之復會蕭閒堂已撤幕壁間有君
像題曰權杭州觀察米元章像楊之儀筆楊之傑贊曰
君子之交小人之讐以今方人叔度宜儔余以袖掩字
而問行之曰誰歟行之曰君也僕爲檢同氣德識面三
編無君名姓嗚呼古人論世取友况同世哉世復有三
君子者觀文殿學士王公韶字子純樞密直學士劉公
庠字希道則僕竟不識其面選人蔡君肇字天啓於相
知間語僕如素心腹者云得僕於王荆公蓋僕於元豐

六年赴希道金陵從事之辟會公謫居始識荆公於鍾
山間公門有數十後進喜爭名而相非又記以長者之
言也如天啓樂道人善者一人而已僕老矣不知一蔡
二楊行能識面因延叟語發悲嘆并記其事於家集中
以貽子孫嗚呼仕開求進之語則世人之邪說大行紛
紛不求已而求人豈其本心實利誘然今樂善君子一
何多耶彼口不道忠信捷捷而惡人翩翩而自喜點點
懷奸藏慝竊竊掩人之善沾沾自標置者得不少悛乎
既序其事因系以詩

惟起蕭閒堂圖贊凡醜質昧昧豈我思有懷斯士吉吾生
終不過二陵已相失苟養走四方公卿更絕跡向我交漸
稀背憎十六七豈吾九畹蘭任汝滿地棘我豈蕭閒人偶

然得空壁美哉何方彥精絕入妙筆君不愧顧長康取媚
桓溫圖九錫我不媿孟浩然緩策京山遇摩詰前此交道
久不康紛紛白頭多不卒嗚呼紛紛白頭多不卒回首此
君應辟易

